

VENDIM
Nr. 628, datë 31.10.2025

PËR SHPALLJEN DITË ZIE KOMBËTARE NË NDERIM TË TË NDJERIT,
FATOS NANO, ISH-KRYEMINISTËR, UDHËHEQËS DHE POLITIKAN I
SHQUAR

Në mbështetje të nenit 100 të Kushtetutës, të pikës 4, të nenit 4, të ligjit nr.8926, datë 22.7.2002, “Për formën dhe përmasat e flamurit kombëtar, përmbajtjen e himnit kombëtar, formën dhe përmasat e stemës së Republikës të Shqipërisë dhe mënyrën e përdorimit të tyre”, dhe të pikave 12, 13, 14, të kapitullit VI, të Ceremonialit Shtetëror të Republikës së Shqipërisë, të miratuar me vendimin nr.420, datë 8.6.2016, të Këshillit të Ministrave, të ndryshuar, me propozimin e Kryeministrit, Këshilli i Ministrave

VENDOSI:

1. Shpalljen ditë zie kombëtare ditën e dielë, datë 2.11.2025, në nderim të të ndjerit, Fatos Nano, ish-Kryeministër, udhëheqës dhe politikan i shquar.
 2. Organizimin e ceremonisë funebre shtetërore dhe të Homazhit Kombëtar në nderim të të ndjerit.
 3. Në të gjitha institucionet shtetërore dhe publike të ulet flamuri kombëtar në gjysmështizë.
 4. Në orën 12.00, në nderim të tij të ndërpritet çdo veprimtari dhe të mbahet një minutë heshtje.
 5. Radiotelevizioni Publik Shqiptar, gjatë zhvillimit të ceremonialit funebër shtetëror, të transmetojë muzikë funebre.
 6. Homazhet Kombëtare të organizohen ditën e dielë, nga ora 8:30 deri në orën 11:00, në mjediset e Pallatit të Kongreseve.
 7. Ceremonia funebre shtetërore e lamtumirës do të organizohet të njëjtën ditë në orën 12:05, në mjediset e Pallatit të Kongreseve.
 8. Për organizimin e ceremonisë funebre shtetërore ngrihet me urdhër të Sekretarit të Përgjithshëm të Këshillit të Ministrave Komisioni i Posaçëm Shtetëror, nën mbikëqyrjen e Kryeministrit, i cili në përbërje të ketë:
 - Ministrin e Mbrojtjes;
 - Ministrin e Punëve të Brendshme;
 - Nënkryetarin e Bashkisë Tiranë;
 - Sekretarin e Përgjithshëm të Këshillit të Ministrave;
 - Drejtorin e Protokollit të Shtetit;
 - Drejtorin e Përgjithshëm të Policisë së Shtetit;
 - Komandantin e Gardës së Republikës së Shqipërisë;
 - Drejtorin e Drejtorisë së Shërbimeve Qeveritare;
 - Përfaqësues nga kabineti i Kryeministrit;
 - Përfaqësues nga zyra e shtypit të Kryeministrit.
 9. Ngarkohet Sekretari i Përgjithshëm i Këshillit të Ministrave që të krijojë dhe të drejtojë grupin e punës, përgjegjës për ndjekjen dhe zbatimin e masave organizative të ceremonialit funebër shtetëror.
 10. Shpenzimet e varrimit dhe të ceremonisë funebre shtetërore të përballohen nga institucioni organizator i ceremonialit.
- Ky vendim hyn në fuqi menjëherë.

KRYEMINISTËR
Edi Rama